



**Komunikadu Imprensa**  
**23 Marsu 2022**

**Komunidade suku Casabauk foin primeiravés hatene informasaun kona-ba  
prosesu justisa formál hasoru aman ka inan abandona oan**

Iha 16 Marsu 2022, JSMP kontinua realiza treinamentu ba membru konsellu suku no comunidade fetu iha Suku Casabauk, Postu Administrativu Tilomar Munísipiu Covalima kona-ba Demokrásia, Knaar Órgaun Soberanu, Partisipasaun Públiku iha Prosesu halo Lei no Asesu ba Justisa Formal.

Partisipante sira ne'ebé partisipa iha treinamentu ne'e hamutuk ema na'in 20, kompostu husi fetu 14 no mane 6 ne'ebé mai husi Xefe Aldeia, representante fetu, delegadu/a sira no comunidade Suku Casabauk.

Treinamentu ne'e ho objetivu atu hasa'e koñesimentu membru comunidade fetu no konsellu suku sira kona-ba demokrasia, kna'ar órgaun soberanu, partisipasaun públiku iha prosesu halo lei, asesu ba justisa formal inklui hatene sira nia direitu kona-ba liberdade atu asesu ba informasaun nune'e bele mellora liután sira nia serbisu iha comunidade.

“Treinamentu ne'e hanesan meu ida atu hasa'e koñesimentu partisipante sira nian liuliu lideransa suku atu hatene kazu sira ne'ebé bele rezolve, taka no kazu ne'ebé tenke lori to'o ba iha justisa formal. Nune'e mós hasa'e koñesimentu partisipante fetu sira atu asesu ba informasaun no bele defende sira nia direitu kuandu ema ruma viola sira nia direitu,” dehan Sra. Ana Paula Marçal, Diretora Ezekutiva JSMP.

Materia ne'ebé fahe iha sesaun treinamentu ne'e mak hanesan demokrasia, kna'ar órgaun soberanu, partisipasaun públiku iha prosesu halo lei, asesu ba justisa formal (direitu, lei, krime, kna'ar juis, prokuradór, defensor públiku/advogadu privadu no polísia) no direitu atu ho liberdade asesu ba informasaun tuir Konstituisaun.

Iha sesaun apresentasaun, partisipante sira antusiasmu ho materia ne'ebé fahe iha treinamentu ne'e. Partisipante sira foti kestaun balu kona-ba oinsa atu rezolve problema ne'ebé envolve labarik sai vítima husi inan-aman ne'ebé fahe malu ona (separadu), atuasaun ne'ebé polísia halo ba comunidade sira no kazu sira ho natureza violénsia

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275

Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

doméstika ne'ebé nu'udar krime públiku ka labele rezolve iha suku maibé parte rua hakarak rezolve de'it iha sira nia suku.

Relasiona ho aman ka inan abandona oan sira, primeiru JSMP esplika kona-ba responsabilidade ina-aman no direitu oan sira. Liután JSMP esplika kona-ba knaar ministériu públiku liga ho oinsa asegura defeza menór sira nian. Maski ministériu públiku mak na'in ba asaun penál maibé aumezmu tempu sai mós defensór ba menór sira. Ministériu Públiku representa labarik sira iha asaun sivíl kona-ba ezersísiu poder paternál hodi husu inan-aman nia responsabilidade atu tau-matan ba menór sira nia direitu liga ho alimentasaun ba aihan, nesiedade sira seluk ba sira ninia presija, hela fatin no direitu atu vizita família. Bainhira atu hatama prosesu ne'e importante liu maka dokumentu menór sira nian.

Kestaun kona-ba atusaun husi membru polísia nian ne'ebé halo ho violénsia, JSMP esplika katak polísia labele uza violénsia iha kualkér atusaun tanba ne'e se mak sai vítima ba hahalok violénsia ne'e, tenke hato'o keixa ba iha polísia ka bele mós diretamente ba hato'o iha ministériu públiku.

Hatan ba preokupasaun comunidade nian kona-ba krime ho natureza violénsia doméstika, JSMP esklaresse liután kona-ba Lei Kontra Violénsia Doméstika ne'ebé konsidera krime sira ho natureza violénsia doméstika nu'udar krimé públiku. Signifika katak ema se de'it mak hatene kona-ba akontesimentu krime sira envolve família sira íntimu bele halo denunsia, la presija hein vítima mak tenke hato'o keixa. Xefe suku sira labele foti desizaun ka taka (haruka fila) krime sira violénsia doméstika. Xefe suku sira bele rezolve atu halo prevensaun no promove armonia maibé ninia prosesu tenke nafatin lori ba to'o iha tribunál atu hetan desizaun ikus husi tribunál. Dame malu iha suku ne'e, nu'udar sirkunstánsia ida atu hakmaan arguidu sira nia kastigu. Xefe suku so bele rezolve de'it kazu sira ne'ebé ho natureza semi públiku.

Antes ne'e, iha abertura Xefe Suku Casabauk, Sr. Inacio Amaral Gusmao husu ba partisipante sira atu uza oportunidade ne'e ho dí'ak tanba materia sira ne'ebé atu fó iha treinamentu ne'e importante tebes no dala ruma kazu krime sira ne'ebé akontese iha suku laran comunidade sira la hatene atu hato'o keixa ba se. Alende ne'e, kazu barak mak mai to'o iha suku maibé nafatin laiha solusaun atu rezolve tanba iha kazu balu lei la fó dalan atu xefe suku bele rezolve.

Iha enseramentu xefe suku hato'o ninia agradesimentu ba JSMP ne'ebé hili sira nia suku hodi fahe informasaun ba sira liuliu kona-ba democracia, asesu ba justisa formal no liberdade atu asesu ba informasaun tanba informasaun sira ne'e útil tebes ba sira. Xefe suku mós husu ba partisipante sira bele fahe informasaun ne'ebé sira hetan iha treinamentu ne'e ba iha comunidade sira ne'ebé la partisipa iha treinamentu ne'e.

Atividade treinamentu ne'e realiza ho fundus mai husi União Europeia, Parseiru Suporta CEPAD no treinamentu ne'e realiza husi JSMP.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)